

GUTFONDE: MISA LONG NAIT

1. RIT

Eks 12:1-8, 11-14

Akar dapanim: Ekiam, akar gavgaviba Israelia ganiga me migia ghaze, me Dughiar Ensel Israelia Gitazim ginighnigh isar ekiam damuam.

Akar kam, a Ua Me Inimin Akinafarim, o Eksodas, an aven iti.

Ezi Moses ko Aron Isipin kantrin ikiavira itima, Ikiavira Itir God kamaghin aningin migei, "Iakinir kam, a ian azenibar faragha zuir iakinimin ikiam. Ni Israelian gumazamiziba kamaghin me mikim, iakinir kamin aruer namba 10, gumaziba bar vaghvagh uan adarazi bagh sipsipin igiatam ko memen igiatam, amisefegh. Egh dipenir vamiran adarazi suvigh, asizim a givaghan koghti, afeziam mangi men boroghin itir darazir mikemeghti, me izi asizir kam tuiragh uari daning aneremi. Me deraghvira nighnigh, asizir kam deragh gumaziba ko, amiziba ko, boribar tuiraghti, me asizir tuzir kam agivagham. Egh ni ua bagh vaghvagh sipsipin apuritam o memen apuritam amiseveghti, an azenir vamira ikiti, duatam an mikarzimmin ikian marki. Egh me asizir kaba uari bagh deraghvira dar gan mangi iakinir kamin aruer 14in otogh. Eghti dughiar kamra, an guaratizimin, Israelian gumazamiziba bar uan asizir kabav sueghti, da arighreghe. Egh me asizimin ghuzitaba inigh, uan dipenimin tiar akabar miriabagh asezir tememning daghuigh, dipenir kamin aven me iki asizibar amam. Egh uaghan tiar akam gisin itir temer ighuvim aghefegh. Egh dimagarir kamin me sipsip o memen tuzim avimin a tuagh, egh ia asizir tuzir kam yis puvatizir

bret ko zuravarir misozim sara aneremi.

Egh ia asizir kabar amisi kamaghin damu. Ia iniba ikegh dagarir asuabar aghuigh, asadivir aghoribar suigh zuamira dar ami. Isar ekiar kam, a Ikiavira Itir God Israelia Gitazir Dughiam Ginighnighamin Isam.

Eghti dimagarir kamra, ki Isipin danganiba bar dar mangi, gumazamizibar otarir ivariaba ko asizibar apurir ivariaba, ki dav soghti me bar arimighiregham. Eghti Isipin aseba bar, ki ivezir kuraba me daningam. Guizbangira, ki uabi Ikiavira Itir God. Ghuzir ia uan dipeniba aghevezir kaba, da ababanimin min ikiam. Eghti ki Isipian gumazamiziba pazi me damuva ivezir kuram me daningam. Ki ghuzimin ganigh, egh ian dipenibagh itagham. Egh ki ia ateghti, ivezir kurar kam ia batoghan kogham. Eghti ia deraghvira ikiam.

Eghti ia dughiar kam ginighnighavira ikiti, a ian dughiar ekiamin min ikiam. Ki dughiar kam ginabaghti, a nan ziam feir isar ekiamin min ikiam. Eghti ia Ikiavira Itir God amir arazir kam ginighnigham. Eghti ian gin otivamin adarasi, akar gavgavimin gin mangi God Israelia Gitazir Dughiam Ginighnighamin Isar kam damu, mamaghira ikiam."

Kar Godin Akam.

Ia akam ikaragh: Kavin kam, Kraisin ghuzimin an e akufa.

Ikiavira Itir God bar deravira na gami.

Eghti ki ua bizir tizimrama a daningam?

Ki ti wainin kavin tam a danigham, eghti ofan kam kamaghin akagh suam,

Ikiavira Itir God uam na ini.

A ua na inizir bizir kam bagh an ziamin dimiva an ziam minamam.

Ia akam ikaragh: Kavin kam, Kraisin ghuzimin an e akufa.

Ikiavira Itir God ua bagha inabagha bar ifongezir gumazitam aremegham,
eghti an damazimin gumazir kamin ovevem, bar bizir ekiamin min ikiam.

O Ikiavira Itir God, ki nin ingangarir gumazim.

Nan amebam faragha nin ingangarir amizimin ike,

ezi datirighin ki nin ingangarir gumazimin ikia egha nin ingangarim gami.

Ezi ni benir na ikeziba firizi ki datirighin firiaghiri.

Ia akam ikaragh: Kavin kam, Kraisin ghuzimin an e akufa.

Ki ni minabisi ni bagh ofa damuam,

egh nin ziamin dimiva nin ziam fam.

Ki faragha ni koma akar dikirizim gami.

Ki datirighin akar gavgavir dikirizir kamin gin mangi nin gumazamizibar
damazibar anekagham.

Ia akam ikaragh: Kavin kam, Kraisin ghuzimin an e akufa.

2. RIT

1 Ko 11:23-26

Akar dapanim: Ia zurara dughiaba bretin kam, ko wainin itarir kam ramiva, ia Ekiamin mizazim ko ovevem in gun mikim, mangi dughiar a uamategh izamimin tugham.

Akar kam, akinafarir faragha zuim, Pol Korinin gumazamiziba baghava an osirizimin aven iti.

Akar ki ia mikemezim, kar Ekiamra na ganingi. Akar kam kamakin: Dimagarir Judas Iesus isava apanibar agharim gatizimin, Iesus bret inigha, egha God minabagha anebigha ghaze, "Kar nan nivafizim, ki ian akurvaghasa anenidi. Ia kamaghin damuva, na ginighnigh." Me amegha givazi, a wainin itarim inigha, kamaghiram ami. A kamaghin migei, "Wainin itarir kam, an Akar Dikirizir Gavgavir Igiam,

ki uan ghuzimin a gamua gavgavim a ganidi. Ia anemamin dughiamin, ia anemiva na ginighnigh." Iesusin akar kam kamaghira en aka, zurara dughiaba ia bretin kam, ko wainin itarir kam ramiva, ia Ekiamin ovevem in gun mikim, mangi dughiar a uamategh izamimin tugham.

Kar Godin Akam.

WELKAMIM GUTNIUS

Ekiam Krai Iesus, e nin iziam fa iziar ekiam ni ganidi.

Ki Akar Dikirizir Gavgavir igiam ia daningasa. Ki ia gifongezi moghin, ia uari uarigh ifonge.

Ekiam Krai Iesus, e nin iziam fa iziar ekiam ni ganidi.

GUTNIUS

Jo 13:1-15

Akar dapanim: A uan gumazamiziba bar me gifonge, egha a bar moghira me gifueghavira ikia ghua dughiar an aremezimin tu.

Ia, Krai Iesusin Akar Aghuir Jon osirizim, a baragh.

Dughiar kam, God Israelbagh Itazir Dughiam a gurumizaraghan otivam. Ezi Iesus fo, a mangamin dughiam otozi, a nguazir kam ategh uan Afeziam bagh mangasava ami. A uan gumazamizir nguazir kamin itiba a fomira bar me gifonge, egha me gifueghavira ikia ghua an areme. Ezi guaratizir kamin me apa iti. Satan faragha nighnizir Iesus isi apanibar agharim darighamim isa Judasin navim gatigha gifa. Judas, a Saimon Iskariotin otarim. Iesus kamaghin fo, Afeziam bizibar amuamin gavgavim bar a isa a ganingi. A uaghan kamaghin fo, God anemadazi a ize, egh a ua God bagh mangam. Kamaghin amizima Iesus dagher dakozim ategha dikafi, egha uan korotiar ruarim suegha, egha taulin mam inigha uan ivariam ike. Egha dipam itarir mam ginge, egha maghira uan suren gumazibar dagariba ruegha, egha taulin a uan ivariam amighirizimin da adisi. Egha a Saimon Pita bagha ize. Ezi Pita an azara, "Ekiam, nirara nan dagariba ruam?"

Ezi Iesus kamaghin an akam ikara, "Bizir ki amim, ni datirighin a gifozir puvati. Egh ni gin a gifogham."

Ezi Pita a migei, "Ni nan dagariba ruan marki. Bar marki!"

Ezi Iesus kamaghin akam ikara, "Ki nin dagariba rueghan koghtima, eghti ni na ko ikian kogham."

Ezi Saimon Pita a migei, "Ekiam, ni kamaghin nan dagaribara ruan marki. Ni nan dagariba ko dafariba ko dapanim sara, bar da ruam!"

Ezi Iesus a migei, "Gumazir ruegha givazim, a zue, a ua ruan marki. A pura dagaribara ruegh egh bar zuegham. Ezi ia bar moghira zuegha givagha iti. Ezi ian gumazir vamira, a zuezir pu." (Iesus gumazir a isi apanibar agharim darighamim, an a gifogha gifa. Kamaghin a ghaze, "Ia bar moghira zuezi, ezi ian vavira zuezir puvati.")

Iesus men dagariba ruegha givagha, egha uan korotiar ruarim uam anerugha egha ua ghua uan dapiamin danganim gapera. Egha kamaghin men azai, "Ia, ki ia bagha amizir bizir kamin mingarim gifo, o? Ia 'Tisa' na garigha egha 'Ekiam' na garisi. Guizbangira, ki Tisa egha ki ian Ekiam. Egha bar deragha ia kamaghin migei. Ki, ian Ekiam ko ian Tisa, egha ki ian dagariba rues. Ezi ia uaghan uarira uarir dagariba ruegh. Ki arazim ian akazi, ezi ia uaghan arazir ki datirighin ia gamizir kamra damu."

Kar, Krai Iesusin Akar Aghuim.

